



Sarvesh-i Diamond League nung otsü tase ka yangluogo

Trump-i pa tepsettsü yimyim ayimba sülen Iran amokmeren

VOL. XXIII ISSUE NO. 269 (ADOK 269) DIMAPUR AMUNGNÜ (SUNDAY) CHITENI (JULY) 12, 2026

₹ 5.00

NPF den loktepba ya 'Going Home' mapang ka lir: RPP President Joel Naga

Kohima, July 11, 2026 (TYO): Rising People's Party (RPP)-i Naga People's Front (NPF) den loktepba ya "Going Home" mapang ka lir aser onoki maneni Chief Minister aser NPF president Neiphiu Rio lenisüba kübok Naga maitsü, sobaliba aser telongjem atema noktaksü ta RPP president Joel Naga-i ashi.

Yaküm NDPP aser NPF lopktepba sülen onoki NPF den lokteptsü telemtetba agi. NPF-i regional party tem aser kasa tangatetba aliba nisungtem dang regional platform nung adentsü mepishia liasü ta Joel-i ashi.

"1963 küm tentetba mapang nungi Nagaism atema inyakba telok ta Chief Minister Dr. Neiphiu Rio-i ashiba party-i onok aoer. NPF-i Naga maitsü, inyaksangshi aser telongjem atema noktaker" ta paisa ashi.

Rio lenisüba kübok NPF nung adentsübaji tang ya mapang tajung lir ta RPP-i bilem kechiyong party anaprong dak kasa tangatetba lir aser Naga yimten tebilemtsü atema tenangzükba lir ta Joel Naga-isa ashi.

Nagaland nung punguben

tashi Chief Minister Rio-i onok ka kuma lokteptsüsa maongka agütsüba atema pelar. RPP lenisüba aser züngsemtemi Rio lenisüba sülen anidaksü aser party tangatetba aser telatetba sülen anidaksü ta paisa ashi.

1963 küm tentetba sülen nungi NPF-i regionalism atema inyaka arur aser Naga nunger len ania arur. Naga nungeri mapang tamajungtiba ajurudang NPF-i nübertem den külemi noktaker aser India nung regional political parties tejentiba aser tashitaittiba rongnung ka kumogo ta Joel-isa ashi.

"NPF ya political party ka dang masü saka Naga reju ka lir, koba ajanga Naga nunger longjemba aser Naga nunger taginüba tongtetba tamendakdak ka akümtsü" ta paisa ashi.

Naga yimten latettsü atema NPF jenjang tajung nung lir aser Naga nunger ajaki regional party tashi itdaksüra iba alizüng atongtsü ta paisa shisem.

NPF den loktepba ya temeten ka masü saka maongka ka lir aser iba ajanga RPP-i Naga nunger asoshi tenangzükba ayuba kuli agütsür ta Joel Naga-isa ashi.

NNC Vice President Zapu-o Zhasa pelaa agizük

Kohima, July 11, 2026 (TYO): Honibarnü Kigwema Village Council Hall nung Vice President (HQ) Elect, Naga National Council (NNC) Zapu-o Zhasa nem tetushi agütsüba sentong ka agiogo.

NNC nung züngsemtemi pa nem Vice President (HQ) inyaktsü mapa lemzüksüba atema pelar ta Zapu-o Zhasa-i ashi.

"NNC lenisüba aser national workers-i tamang akaba atema pelar aser ni bendanga agüja tenzüksü nangzük. NNC nükjidongtem tongteta inyaktsü atema maneni züngsemtemi ni

pusema nungittsü imlar" ta pai ashi.

"Naga national movement nung lanuwa nungi nyaka arudang Kigwema nunger Neilhounyü Yhokha ajanga ajungmesoa liasü. Pa ya shia meteta ka aser A.Z. Phizo den tesentaktep tajung alir ka liasü. Phizo-i Kigwema nung anenzükba ajanga ni tanur asüdag Naga national movement nung adentsü mulungtet" ta Zhasa-isa ashi.

Zhasa-isa nübertem tenzüksü aser Naga nunger taginübatem, mangdangtem aser külem alizüng ajanga len anitsü ta ashi.

Imphal West nung Meitei nunger ki rongdoktsü

Imphal, July 11, 2026 (Agencies): Manipur kübok Imphal West district nung Honibarnü Meitei nungeri azüngteta yutsüba ki aika rongdoktsüba ajanga tensa mejungi kumogo.

Kanto Sabal area nung ki rongdoktsüba sülen nisung 600 shi adener iba tesemi aotsü merang saka sepaitemi noktanga liasü.

Iba tatalokba atema police-i FIR ka benokogo aser bushisüngdang südar. Iba tesem nung tensa azüoka ayutsü atema security forces mapa lemzükja lir.

Kanto Sabal nung mi adokba anguba sülen Meitei aser Naga nunger aika adenshia liasü.

Ajisüaka central security forces-i parnok tesem tonga meyoki noktang aser tear gas shells amshia telok senshidaksü.

Anameta aliba Kangpokpi district nungi Kuki nungeri kiojen nung mi senoktsü asütsü ta iba tesem nung alirtemi ashir.

Kangpokpi district nungi nisung telok ka Kanto Sabal-i aru aser Meitei nunger ki aika nung mi senoktsü ta parnok ashir.

May 2023 nung kin o kin tsüngda mepetmesü adokba sülen nisungtemi ki toktsür jena ao.

Kanto Sabal ya Imphal Valley tatemleni lir aser Kuki nunger teimba ser aliba Kangpokpi district den arrtsütepa lir.

RPP-i NPF den loktepogo; CM Rio-i Naga nunger tali longjemtsü ayongzük



NPF Central Headquarters nung Rising People's Party (RPP)-i Naga People's Front (NPF) den loktepba sentong nung agiba noksa ka angur.

Kohima, July 11, 2026 (TYO): July 11, 2026 nü NPF Central Headquarters nung Rising People's Party (RPP)-i Naga People's Front (NPF) den loktepogo.

RPP ya October 2, 2020 nü tenteta liasü aser June 2021 nung Election Commission of India den register asü. Joel Naga lenisüba kübok RPP ya regional alternative ka ama sayua liasü aser parnok clean governance aser electoral reforms nung temulung agüja nüboyimba maparen inyaka liasü, ajisüaka 2023 Nagaland Assembly election nung parnok menden ka nung danga takok mengutet.

Nagaland nung züngsem 60 agi akümba State Assembly mesüra Urban Local Bodies kecha nunga RPP züngsem ka danga mali.

"Iba ya political telok ana loktepba dang masü saka Naga nunger taginüba nung ajemdaker nisungtem, shisatsü, ajangshibatam aser taginübatem ka akümba lir" ta NPF President & Chief Minister Neiphiu Rio-i ashi.

NPF atema tongtipangtiba mapaji Naga yimten tebilemtsü lir aser Naga nunger rongnung telongjem tali adoktsü nüngdaker ta pai ashi.

Nagaland nung opposition maliba sorkar ajanga MLA temi külemi Naga yimten tebilemtsü asoshi longjemmer inyaktsü

bangzüng sayur. Iba ya NPF aser People's Democratic Alliance (PDA) Government atema tongtipangtiba teinyaktsü lir ta CM Rio-isa ashi.

NPF-i maneni tiyongtsü nung teyariteper tajung ka ama inyaktsü aser küm aika mebenteti aruba Indo-Naga yimten ken o latettsü atema merangtsü ta paisa shisem.

Naga nungeri küm aika yimten latettsü atema atayonga aru aser ajak densemba yimten latetdaksünür. NPF-i maneni nübertem taginüba atongtsü atema meranga inyaktsü ta Rio-isa metetdaksü.

"Naga nunger mapang talangka Nagaland, Manipur, Arunachal Pradesh, Assam aser Myanmar nung arrtsütem ajanga lemsar arur saka meimchiri yangluba arrtsütem ajanga külem putiotsü mesamatettsü mesüra külem maitsü tashimait mekümdaksütettsü" ta Chief Minister Rio-i ashi.

Naga nunger aliba tesem ajak ka akümtsübaji tangbo makoktsü akok saka nübertem maneni "emotional integration" atema inyaktsüla aser ibaji Naga kintem tsüngda tesentaktep akangshitepba ajanga akoktsü ta paisa ayongzük.

Naga nungeri ketdangsubaren ka kübok kibong ka ama longjemnür anungji iba taginübaji senzuka mayutsüla ta paisa

shisem.

Paisa Manipur nung Naga nunger dang Assembly elections mapang NPF tashi itshitsü aser Naga nunger taginübatem asoshi common political platform ka asoshi inyaktsü mepishia metetdaksü.

NPF-i Bharatiya Janata Party (BJP) den tesentaktep ayuba ya tekaraba nung yimten latettsü aser Nagaland renloka aotsü nükjidong nung lir, ajisüaka NPF-i maneni Naga maitsü, inyaksangshi aser Khristan tangatetbatem kumzüka ayutsü tenangzükba lir ta CM Rio-isa ashi.

Iba sentong nung mendenji NPF Working President Ahovi Zhimomi liasü, taoba State Chaplain Rev. Yamyap Konyak-i temoatsü meshia sarasadem aser Advisor to the NPF President Apong Pongener-i tesentepertem pelaa agizük.

NPF President Emeritus aser Advisor to the Chief Minister Chingwang Konyak-i o jembiba sülen RPP President Joel Naga-i par party NPF den loktepba osang sangoktsü.

NPF Secretary General & MLA/Advisor Achumbemo Kikon-i züngsem tasentem pelashishia agizük aser NPF Working President Pusazo Luruo-i parnok nem tezüngzüktep agidaksü. Tatem nung NPF Senior Vice President Charlie Sekhose-i anküp tepela o jembiba.

ENWO-i Sankal-DHEW, DCPU aser Sakhi OSC den yaritepa tetsür-tanur kumzüka ayutsü shisatokden

Mokokchung, 11th July (TYO): Eastern Nagaland Women Organization (ENWO), Mokokchung Unit-i SANKALP-District Hub for Empowerment of Women (DHEW), District Child Protection Unit (DCPU) aser Sakhi One Stop Centre, Mokokchung den yaritepa "Protect Children and Empower Women" omen nung ajemdaker angazükshiba (sensitization) sentong ka 11th July nü Mokokchung Aongza Ki nung ayongzuka agiogo.

Iba sentong nung Eastern Nagaland Women Organization Tir, Yingphe Konyak-i jembidang, tetsür aser tanurtem kumzüka ayutsü, tim akümtsüba agütsütsü aser tashi itdaksütsü

asoshi külemi inyaktsü nüngdak, ta metetdaksü. Lai shilem agirtem dang tashiyim mapa inyakba, tebandang amshiba aser tim masüba nungi jenbua alitsü asoshi lungjemmer inyaktsü ayongzük.

Naga nunger lokti nung tetsür tashiyim agi raksatsüba (rape case) tebilemtsü ya tang amai kangabo bulua maliasü, saka tanübo kanga bulua ataloker, ibai technology tejakleni aoba agi asü masü'ar yangi tebilemdangtsü tulu lir. Iba dak sentakba nung arogo-a teinyaktsü/khuret lir, ta lai tebilemba ka metetdaksü.

Iba ama sentong ya mapangaben agitsüla, eastern pur lokti tentet (CSOs) mapaji mozü/yi meita reprangba nung dang

metemtsüla saka kidang kibong nung tanurtem education koma angazükdar, kidang kibong nung timtem lir mali, mesüra terenlok mapa timi inyaker asü masü? Itemjia meita reprangtsüla, ta laisa inyakdaksünüba olen ka lemsatep.

Naga nungerji tebur tokolak sür aniba lokti ka lir, iyongji teburtem maongka tuluba angur. Asenoki aiben Naga lokti nungbo tetsür-tebur tsüngta tebandang kecha balaka sadanga mamshir ta jembir saka telung tonga ira tetsüngta tulu eita lir. Tetsürtem jenjang ajungkettsü asoshi tetsürtem nem sabang aser maongka agütsütsü nüngdaker, ta lai ashi.

(Maneni tapak 2 nung...)



Dimapur Ao Baptist Arogo nung Yongküm Fellowship lanurtemi " Ao Oshi Dangi Meipdi " ta ser Sobaliba sentong ka Chiteni 11, 2026 anogo nung ayongzükba sentong nung shilem agirtem kar noksa nung angur. Iba sentong nung lanurtem rongnung Sübusülemsü Nüngjakojatem, Metsüjangnutsü Toktendak aser tetsü tebou kensü nung Tenüngsang Agütsüba ken toktepbatem liasü. Iba sentong nung Tir Yimiyim Yimozülur, K. Temjen Jamir aser Sign Reach Bilingual Academy nung Director , Imti Jamir nati shisalemsatepa liasü. (Dimapur, July 11,2026)



NPF Jangpetkong AC Waromung & Alongkima nung amendakshiogo



July 10 nü MLA & Advisor Temjenmemba matsügang 29 Jangpetkong AC NPF tir Aodangnok-i Alongkima jila nung NPF wako atsüketba noksa nung angur.

Waromung, Chiteni/July 11 (TYO): 29 Jangpetkong Assembly Constituency nung Naga Peoples Front tamendakdak akangshiogo. Waromung yimtsüng aser Alongkima jila nung NPF party unit balala ketdangpurtem tenangzüktepba agi, aser Jangpetkong AC NPF tir Aodangnok Ozukum-i pei unit senyur kidang NPF wako atsüketja liasü.

July 10 nü iba sentong nung MLA & Advisor for Transport & Technical Education Temjenmenba-ia shilem agia liasü.

NDPP aser NPF na taküm küm May ita longjemba sülen Constituency nung iba inyakyim ya benoka inyaksü nüngdaka aküm.

Constituency nung NDPP aser NPF naprongla kanga tashi ita lir asünung party office tentetshiba mapang aikati pei mapa bendanga agütsütsüsa kümogo. Iba dak sendakba nung sentong nung o jembirtemi, MLA & Advisor Temjenmenba kübok Constituency aser Chief Minister Dr. Neiphiu Rio kübok

NPF Party constituency terenlok atema unit ajak nungi party lenirtem nükla tajung aliba atema tenüngsang agüja liasü.

Alongkima ya Jangpekong atema administrative head (EAC HQ) aser Waromung ya constituency kübok yimtsüngtem rongnung tulutiba ka aser voter aika lir asünung iba sentong ya kanga tongtubang liasü.

Wako atsüketba aser tenangzüktepba agiba ajanga unit tem nung NDPP aser NPF na tsünga yimden yimsütsüba tsütsü tangatetba balala aliba tembangba sayur aser MLA Temjenmenba atema tamendakdak akangshitsüogo.

Waromung aser Alongkima naprongla nung o jembiba mapang MLA & Advisor Temjenmenba-i, Waromung yimtsüng nung Ao Kaketshir Telongjem küm 100 ajungba benjungmung amungtsü aliba dak sendakba nung Constituency nung terenlok maparen balala indang jembia liasü. Pai par tükong nung lenmang majungba indang jembia aser ashiba agi, Chief Minister-i lenmang yanglutsü atema

senotsü agütsütsü atema tongtibangsa inyakdar, ta ashi.

Yimden yimsütsüba dak sendakba nung Temjenmenba-i ashiba agi, NDPP aser NPF na ya regional party lir, aser regional party ana aliba ya Naga nung atema majung ta bilema liasü. Anungji Naga nung ajungkettsü aser maitsü o tejangrabatem wazüka ayutsü atema party ana ya longjema Naga nung tenüng nung nokdaksü atema regional party ka dang kümogo, ta ashi.

Maneni pai party kübok inyaktertem dang grassroot jenjang nung takok tashi inyaksü ajungshi, kechiyong MLA ya electorate temi nongit nungdang tashi ita inyaktettsü aser Constituency terenlok atema longjemer inyaktettsü, ta ashi.

Kasa mapang nung tenangzüktepba agiba mapang 29 Jangpetkong Assembly Constituency tir Aodangnok Ozukum-i lenir tasentem ajak nem tenüngsang agütsü aser ashiba agi, tenangzüktepba agiba ya o dang masü saka party tangatetba sülen tashi anga inyaksü, party aser nüburtem tejangraba atalokdaksütsü atema aser Party wako aser lenirtem akümtsübuttsü atema agiba lir.

Waromung aser Alongkima nung wako atsüketba aser tenangzüktepba agiba sentong takok ngua agiba sülen 29 Jangpetkong AC NPF party-i unit balala nung iba amala mesükba sentong balala ayongzüka agiyonga aotsü, ta party Media & Publicity Cell sangdong ka ajanga metetdaksü.

Jacob Zhimomi-i Niuland nung PHED Division office semzüksü

Dimapur, Chiteni/July 11 (TYO): Minister for PHED & Cooperation, N Jacob Zhimomi-i July 10 nü Niuland jila nung PHED Division office semzüksüogo.

Iba ki ya 2025 küm January ita yanglu tenzük aser sen lakh 185 entoka ita 18 tsünga atazüka aliba mapang shitak nung yangluzükogo.

District ajak nung nüburtem nem service kasa agütsütsü atema district headquarter tem nung infrastructure tajung agütsütsü asoshi department nükla aliba nung iba project ya shilem ka lir.

Sentong nung o jembiba mapang Jacob-i, iba mapa mapang shitak nung tembanga yangluba nung shilem agir ajak contractor aser Engineer tem nem tenüngsang agüja liasü. Paisa, ki kanga junga yangluba atema tenüngsang agütsüba den iba ki tasenba ya district nung sorkar ki ajak rongnung tajungtiba ka lir ta ashi.

Jacob-i, zünger mapa mongui aliba lanurtem dang aluyimba, teka mapa balala aser skill development nung shilem agitsü ajungshi aser ashiba agi, iba ajanga parnok rongsenketzüngdak sendakba nung tangar dak metaloker malitsü aser district o state rongsenketzüng tajungba kümdaksütsü. Pai lenir ajak dang district nung sorkar

terenlok maparen balala atema teka amteper inyaksü ayongzüka liasü.

Census 2027 dak sendakba nung Zhimomi-i, Niuland jila nung alir ajak pei yimtsüng nung masü saka pei kiyong/mepu nung züngoksemtsüla ta ashi.

Kasa mapang nung Deputy Commissioner Niuland, T L Kiusumong Tikhir-ia, mapang shitak nung iba mapa tembanga inyakba atema department nem tenüngsang agütsü, aser GB, yimtsüng council tem aser lokti tentet balala aser talisa Niuland jila den kidanger Kuhoxu, Viyito aser Hovishe yimtsüng nungertem dang district terenlok atema district administration den teka amteper inyaksü aser nongita yaritsü ayongzüka liasü.

Sentong nungsa Western Sumi Hoho, tatong tir Kughalu Aye aser GB Hokuto Zhimomi natia o tatsütsü jembia liasü.

Maneni Superintendent Engineer (P&T) Er. Vikienyu Zutsa-i technical report agütsü aser Executive Engineer, PHED Circle, Dimapur Er. Bursenla Ao-i tepela ojembia liasü. Sentong ya Executive Engineer, PHED Rural Division, Dimapur Er. Nirie-e Nisa lenisüba nung agi.

ENWO-i Sankal-DHEW, DCPU aser Sakhi ... (TAPAK 2 NUNGI...)

Atep nung asen jalatem nem tasü maittsü o mashitsüla, teburtemji akümtsübuttsüla saka tsübuba yimya ya intoktsüla. Aiben tetsürtemi asenok indang temeten paitoker, anungji, asenoka melenshitsü lir, ta laisa ashi. Naga nung lokti nung tetsür-tebur lirumedema odi asünungbo kadi ka akümtsübuttsüla. Tang ya tetsürtem atuba mapang ka lir, anungji, idang ya teburtemia akok tashi nungitsüla, ta laisa ayongzük.

Tanabuba technical senden nung Moamenla Longkumer, District Mission Coordinator, DHEW Mokokchung-i tetsürtem atema tetsür dak rangloker inyakba yayim aser sorkar sentong balala indang lemsatep. Sakhi One Stop Centre, Mokokchung nung Centre

Administrator Wangshinaro Yaden-i Gender Based Violence & Child Marriage, ozüng dak sentakba onük, teyari agütsüba mapatem (services) aser tim masüba atalokdang koma osang agütsütsü ta asüba onüktem lemsatep.

Child Protection & Child Labour onük indang jembidang Imnatola, District Supervisor, DCPU-Child Helpline-i tanurtem temeten, nurara mapa inyakdaksüba (child labour) ajanga timtem agütsüba aser tanur tim mesüi beshiba aser tashiyim agi shibelenba noktangsü atema loktitemi shilem agitsüba indang onük kar lemsatep. Lai 1098 Child Helpline services indanga ashi aser nüburtem dang care & protection nüngdakba tanurtem indang osang agütsütsü ajungshi.

Imnatola-isa, tanur kümzüka

ayutsüji tanurtem ajak atema tongtubang temeten ka lir ta ashi. Lai Juvenile Justice Act, POCSO Act, Child Labour Act aser Child Marriage Act densema tongtubang lateta akaba ozüngtem indanga metetdaksü.

Sentong temer külen mangatetba asüngdangba aser langzüba senden balaka agia shisalen sayur o adenertem tsünga sensaksem aka. Sentong nung ENWO Mokokchung Unit Vice President, Lushian Khamniungan menden liasü. ENWO Alichen Sub-Union Tir, Tamsula Sangtam-i sarasademer iba sentong tenzük aser ENWO Mokokchung Unit Tir, A Mandang Phom-i tarurtem pela-a agizük. ENWO Mokokchung Unit tongti zülur, Esther Sangtam-i tepela o metetdaksü.

Kohima nung field semdangzükba Enumerator tushi

Dimapur, Chiteni/July 11 (TYO): Deputy Commissioner, Kohima, B. Henok Buchem-i, July 10 nü pa indang office nung Census Enumerator Ketseinuo Sote nem la mapa tajung asoshi Certificate of Appreciation ka agütsüogo.

Lai Kohima Sadar Rural Charge kübok House Listing aser House Census exercise nendaka aser bendanga agüja inyakba atema tenüngsang agütsüogo.

Sote ya Enumeration Block (EB) No. 0027 nung physical fieldwork tembanga inyakba mezüngbuba enumerator kümogo.

Kuli kakat agütsüba mapang Deputy Commissioner-i,

Principal Census Office-i, Census inyakyim nung densema aliba nisungtem ajak mapa kanga junga meita atadar aser iba den field nung tetsükdaksü balala ajangshiba bentettsüba den iba inyakyim kecha tetsükdaksü makai benoka inyaksü atema tenüngdakba teyari agüja arudar, ta ashi.

Lai bendanga agüja inyakba aser field tem mapang shidanga nung semdakzükba atema pelaba temaitsü iba kuli kakat agütsüogo.

District administration-i ashiba agi, EB No. 0027 nung physical enumeration mapa tembanga inyakago, saka Census inyakyim lapoka lir aser tanungba official inyakyimtem tembanga minyaki lir.

Vietnam nung rong meküpba lendong nung India nung 15 asü



July 11, 2026 nü Vietnam kübok Ha Long Bay nung rong ka meküpba sülen tangokba noksa nung angur. Iba lendong nung India nung 15 densema nisung 34 süogo.

New Delhi, Chiteni/July 11 (Agencies): Honibar nikongdang Vietnam kübok Ha Long Bay nung yipru aitba ajanga rong ka meküpok aser iba lendong nungji India nung 15 densema nisung 34 süogo, ta osang ka ajanga metetdaksü.

Iba rong nungji passenger 48 den 'crew' züngsem parnok pongu liasü. Ajungbena tzunglu arua yipru aitba ajanga iba lendong atalok.

Rong nung alirtemji teimbaka Vietnam yimtiba, Hanoi semdang raliwalirtem liasü aser parnok rongnung tanur 20 liasü.

Border guards-i nisung 11 kümzük, tasü mang 34 nguogo aser tang tashi nisung 8 bo mangur.

Osangbener den jembidang Ha Long Bay office nung

inyaker, Tran Trong Hung-i, "Nikongdang yirpu ait tenzük aser 2:00 ako tashi nungbo anüng ajak mangadok. Iba dak alia rür tulu tsükba den tzunglu sashia aru aser tsüngi ai," ta metetdaksü.

Iba lendong nung kümzük arrshi küm 10 tebur chanu kati, "Ni tzü waa teyari meshia ayimdena liasü, iba mapang nungji rong ka nung sepaitem arua ni kümzük," ta metetdaksü.

Iba lendong nung India nungera aika asüba osang angashia Ato kilonser, Narendra Modi-i mangyim jashi lemsatop.

Ato kilonser Modi-i X ajanga, "Vietnam nung Phu Quoc asetkong anasa rong lendong nung India nung aika asüba osang angashia jashir.

Takoksa angur kibongtem den ni mangyim jashi lemsateper aser yirua alirtem tekeraba nung aneptsü atema sarasademtsür. Asen Embassy aser Consulate-i akokba tashi yaritepdar.

Asen ketdangsertemisa Vietnam nung ketdangsertem den tongtepratepdar," ta metetdaksü.

Lendong ajuruba rong 'AG-26751' nungji India nung raliwalir 32 densema liasü aser India nung asürtem parnok 15 rongnung Andhra Pradesh aser Telangana na nungi nisung 9 densema lir, ta osang ka ajanga metetdaksü.

Takoksa anguba India nung kibongtem den yariteptsü atema Vietnam nung aliba Indian Embassy-i Chi Minh City nung control room ka amenokogo.

West Bengal nung draft UCC bill atema committee ka tentet

New Delhi, July 11 (Agencies): West Bengal state sorkari draft Uniform Civil Code (UCC), 2026 asadangsü aser renemtsü atema züngsem 9-i akümba committee ka tentetogo, aser iba committee nung tongtiji retired Supreme Court judge, Justice Ranjana Prakash Desai lir.

UCC Bill ji August ita nung state assembly senden aliba mapang nung benoktsü.

State sorkari, "The Uniform Civil Code, West Bengal, 2026, ta ajaba draft bill ji asadangsü aser renemtsü atema committee ka tentettsü nüngdaker," ta metetdaksü.

Iba committee nung tekolakji Retired Supreme Court judge Justice Ranjana Prakash Desai lir aser züngsemtemji- taoba mapang Meghalaya Angh Tathagata Roy, Resident Commissioner Dushyant Naraijala (IAS), Retired IAS officer Shatrughna Singh, Principal Secretary (Home and Hill Affairs) Sanghamitra Ghosh, Retired anthropology professor Dr Ratna Bhattacharya, taoba mapang Gour Banga University vice-chancellor Gopalchandra Misra, Calcutta high court advocate Osman Gani Mallick aser taoba mapang executive director

Nirmalya Bhattacharyya nung lir, ta kasa osang ajanga metetdaksü.

Tan ita tetenzüklen Chief Minister Suvendu Adhikari-i state assembly nung UCC bill ka benoktsü, ta metetdakja liasü.

Taküm West Bengal assembly election atema nüboyimba mapang nung BJP-i election manifesto 'Sankalp Patra' ajanga, BJP-i sorkar akümba sülen ita trok tsüngda UCC bill benoktsü, ta nangzüka liasü.

Committee jagi state balala nung UCC, talisa Assam nung aliba UCC asadangsü.

Women reservation aser census na bendangtsü atema takhangba agütsütsü

New Delhi, July 11 (Agencies): Hokolbarnü tetsürtem temeden atema inyaker tentet aikati, tzungluruwa mongpu Parliament senden tenzükba anogo, July 20 nungi longkak aita tetsürtem nem menden shilem 33 wazüka yutsüba 'Women's Reservation' ya census aser delimitation na nungi bendangtsü atema takhangba agütsütsü, ta metetdaksü.

National Coalition for Women's Reservation (NCWR)-i, Parliament anasa aser Angthem ki anasa longkak aitba den külemi lokti senden ayongzüka akatsü, ta metetdaksü.

Taküm April ita nung Opposition-i Constitution (131st Amendment) Bill anema nokdakba ajanga iba Bill magizükteti liasü.

National Federation of Indian Women (NFIW) tatong tir, Annie Raja-i, "2021 küm NFIW -i writ petition (women's reservation bill) ka Supreme Court nung benok aser yimtenren party den Centre sorkar nem notice agüja liasü. Ajisüaka Centre sorkari telangzüba magütsü, anungji 2023 küm judge kanga jashia liasü. Ibaji ajanga sorkari iba bill (Nari Shakti

Vandan Adhiniyam, 2023) benok. Saka parnoki iba ya yimya balaka nung benoka agizük. Tang Lok Sabha nung menden 543 aliba nung ajemdaker tangsa iba ya mapa küma benoktsüla," ta ashi.

All India Democratic Women's Association Tir, P.K. Sreemathi-i, lai Ato kilonser Narendra Modi dang women's reservation ya March 8 nü (International Women's Day) benoktsü atema mepishia aruogo, ta metetdaksü.

Laisa, "Tenangzükbatemji raksatsü atema masü. Literacy rate 100% aliba Kerala nunga assembly menden 140 nungi tetsür MLA 11 dang lir," ta ashi.

NCWR-i New Delhi nung aliba Jantar Mantar Road nung July 20-21 anogotem nung longkak aittsü.

Indian Christian Women's Movement nung national treasurer, Joycia Thorat-i, "Parnoki tetsürtem nem tashi agütsütsü atema jembir, ajisüaka parnoki onok den kecha mejembir. Census aser delimitation ajanga nüburtem mangmangdaksüba den külemi iba denji women's reservation sendakteptsüba ya parnok tebilemba kar ataloktsü aser state tilatem züngdoktsü atema tetsürtem amshiba lir," ta metetdaksü.

Ram tekülem ki tenla auyaba ya SC-i bushisüngdangtsüla: Congress

Jaipur, July 11 (Agencies): Honibarnü Congress-i, Ayodhya nung aliba Ram tekülem kidang tenla bendenba nung ochimashi tulu lir, anungji iba ya Supreme Court-i ketdangsüa judicial ajanga bushisüngdangtsüla, ta takhangba agütsü.

Party otongdar, Ajay Upadhyay-i, iba ya yimsü tenüng amer auyaba ken o lir, ta ashi. Osangbenertem senden ayongzüka jembidang Upadhyay-i, iba ken o ya senotsü dak sendakba dang masü saka nüburtem tamang den sendaktepa lir, ta ashi.

Upadhyay-i, "Ram tsüngrem tenüng amer bendenba senotsü ya BJP-RSS-i yimteren tsütsü auyaba lir. Iba ya senotsü ochimashi ka dang masü saka tamanger million aika indang tamang ashioktsüba lir," ta ashi.

"Tekülem ki dak sendakba maparen ajak achaayangtsü atema Ato kilonser ketdangsüba kübok trust ka tenteta liasü. Tang iba ochimashi atema shibai khuret agitsü?" ta pai asüngdang.

Congress lenirisa Ram tekülem ki tenla auyaba ken o dak sendakba nung Shri

Ram Janmabhoomi Teerth Kshetra Trust general secretary, Champat Rai aser trustee Anil Mishra na menden nungi anenba metetdakja, "Ajak shidak dang lira kechiba Champat Rai aser Anil Mishra nati anen? Kecha aibelena melira kechiba Supreme Court nem k e t d a n g s ü a bushisüngdangdaksütsü atema parnoki tsübur?" ta asüngdang.

Paisa, "Taila receipts agütsüba, tenla auyaba aser senotsü ochishia mamshiba temai adokogo. Ajisüaka level teküboklen inyaker staff tem anema dang inyakba ajanga tebilemtsü akar. Temple trust nung temaba ketdangsertem anema inyaksü nüngdak," ta metetdaksü.

"Iba ken o nung kechiba Ato kilonseri ola madokerar linük nüburtemi metetner. Onoki iba ken o ya Supreme Court-i ketdangsüa bushisüngdangtsü akhanger, ibaji ajanga dang yimsü nung ajemdaker auyaba ochi jungkai adoktsü," ta pai metetdaksü.

Iba ken o nung aibelener tongtipurtem tangsa aputsüla aser tang aliba trust anener trust tasen ka shimtsüla, ta paisa shisem.



Patna, July 11, 2026: Honibarnü World Population Day anogomong nung Patna Women's College nung azüngertemi awareness campaign nung shilem agiba noksa nung angur.



TIR YIMYIM YIMOBILEM (EDITRIAL)

DIMAPUR SUNDAY, JULY (CHITENI) 12, 2026

Tamakok mapang teyari

Asenok mapa nung tamakok anguba mapang asenoki aiben Tsüngremia meyarir amai tezüdanga bilemtsüa akok mesüra Tsüngremi asenok tamakok tia nung alibaji mangur amai bilemtsüa akok, saka asen tamakok anguba tiaji Yisui angur. Pai asen takok aser tamakok anguba tensa tia ajakji meteta lir. Asenok tamakok tia nung alidang yaritsüba lenmangji nisungibo memetettsü saka Yisuibo meteta dang lir. Ashiko, asenok tamakok tia ka ajurur aliba mapangang ka asenoki Yisuji asangsang nung ajurutsüa akok. Peteria pa mapa nung tamakok aser takoksa ngur aliba mapangangka Yisu ajuru. Asen tamakok mapang Yisui odang yutsür maor saka Pai asen den yarisema tamakok nungi takok tulu ngudaktsür. Amang piyong ayong sema zütsük ona senzür kecha mapu tezüdanga anibelemer aliba mapang ka Peteri Yisu ajuru. Peter ya ango pur liasü. Tetezü pa mapa ajunga agi ango aputsüba dang liasü. Iba ama ango aputsü nung mongin nisung ka amang piyong zütsük ona jajar, ango ka dang mapubaji taküm nung tamakok anguba dang nungi tuluba tazüya mapang ka tenjiba liasü ta asenoki bilemtsüa akok. Tazüya tetezü nisung dak nungi temoatsü samaba mapang lir. Tazüya nisungi kodanga pei mapa nung takok mangutsü aser pei adenba telok dena menentsütsü. Iba ama tezüdangtsü, tazüya aser tamakok mapang ka Yisui Peter ajurutsü renema liasü. Aji oda, iba ama pei mapa nung tamakok ngur aliba nisungang ka Yisui Pa nütüsung asütsü shimtetter liasü. Kodang Yisui Peter tamakok tia anung aliba angu, Pai pa nem takok agütsünü. Aonung piyong amajok nung zütsük ona senzübaji Yisui meteta dang liasü. Kodang Peteri Yisu dang aonung piyong zütsük ona senzüaka ango kata mapu ta ashi, Yisui pa dang ibaji kecha masü, tang nungi nai iba mapaji toktsür kü sülen anidakang ta tamasayongi shinütsüka saka Yisui Peter dang tamasa ango kong lir aser itemji koma aputsü ibaji sayu. Yisui Peter shisatsü nung Pa dak temulung lemtetba aser tashi angaba ali asü mali, ibaji metetnua liasü südi, mesüra Peter dang Pa dak aliba ain jungkai adoka tama sayunü südi. Koba mapa nung aser koba ama tensa tia nung asenok lidir liaka, Yisui asenok nem Pai ashiba angadaktsüner. Yisu sülen anidaktsüba asenok taküm meshitettsüba tama masü saka tashi angatsüba tama arur. Pa dang tashi anga nung dang asenok taküm meshitettsü aser tazüya taküm to agi temoatsü taküm kumadoktsü. Kodang asenoki Yisui ashiba angadir, tamakok anogo agi takok melentsütsü. Peter tamakok aser takoksa nung tezüdanga alidang, Yisui Peter dang tzü tarok leni orr zütsük ondaktsütsü ashi, idangji Peteri ashi, "Kibuba amang piyong onok zütsük ona senzüogo saka kecha mapu saka nai ashiba ama ni zütsük ya ondi," ta ashiba Luke 5:5 nung tatalokba ka angur. "Nai ashiba ama, ni inyakdi," ta asüba o ji Yisui aginüa liasü. Aji oda, Peteri zütsükji ondaktsü aser ango jenti apu. Asenok tamakok angubaji asenoki jungjunga bilemdangra, asenoki Tsüngrem dak masü asenoksasa asenok dak temulung lemer inyakba agi asütsüa akok. Asenok tamakok angubaji asenoki Tsüngrem den tesendaktep mayuba agi mesüra Tsüngrem dang asüngdangr meinyakba agi mesüra Tsüngremi ashi mangaba agi asütsüa akok. Ajisüaka, Tsüngremibo asenok tamakok angudak nung jagi takok ngudaktsüner. Aji oda, na tang tamakok tia nung lira, Tsüngrem dang-dang nü tamakokji shiang. Nai Tsüngrem dang ni kūsasa kanga merangogo saka makoker ta shiang. Idangji, Pai nü dang kong kechi inyaktsü ibaji nü mulung nung jembitsü. Na tezüdanga teli, kechiyong kodang nai Yisui ashi angadir, nü ket aser nü kolok agi nai mamangtsüsa mapa tulu inyaktsü aser takok tulu angutsü. Ibaji, nü taküm nung nü kija merangdangba o Yisu tashi nung inyakba na tetsüngdaji asütsü. Na tamakok tia nung lira, ibaji nü taküm nung Tsüngremi mapa inyaktsüba mapang ta nai metetang aser Tsüngremi kechi shidir tashi angaa inyaktsü renema ataang.

OLEMSABANG

"Ao (Naga) Lima Nung Khristan Yimsü Tetenzük Otsüren Nung Adoka Aliba Khuret: Temaba Academic Tazuokba Kubok Scholarly Research Nungdaker"

~ Rev. Temsu Imchen

Asenok tashi maitem (weakness) tali kumdir, khuret aser teimtem adoker. Asenok Ao Baptist Arogo Mungdang (ABAM) aser Molungyimsen Arogo tsüngda kechi kuret pongdoktsü mokoki arudagi, iba ya asenoki mayimjemba aser teinyaktsü ka meinyakba agi khuret tali penloker ta ajiteter. Asenok teinyaktsü anendaka aliba mapaji, temaba Academic tazüokba kubok Scholarly Research inyakyim nungdaker aser lemantem lapoktsütsüla.

University nung Thesis tem zulur. Item zuluba nung tashimaitem ajitetrapang iba Thesisji zulushitsüdang mapang lezmüksür, mesüra pa/la nem Doctoratetji magatsür. Kodang asenok küja aser lokti nung teimtem adokdir committeetem balala shimteter item khuret pongdoktsü meranger. Kodang item committeetem inyakba nung takok mongudir, tesunep melen teimtem khuret tali bendenloktsü. Anungji Ao Arogo tetenzük otsüren nung adoka aliba khuretya asenoki ano maneni Research Scholar, talisa, Church History Department leniba sür ano ken merangdang nung tajungba asütsü. Iba telok lenitsü asoshi onük kar lemsatepner.

1. Yim ana akumba kulitem: (Factors that lead to separation)
2. Zulua aliba tatalokba otsütem aser documentation teratet. (Interpretations of the events and documents)
3. Case Study: Aogo tenzükba aser Arogo ana kuma lemdanga aliba arogotem dang teyari meshitsü mesüra parnok dang temelaba (Permission) meshir lemsateptsü.
4. Arogo otsü zuluba-yim: (Trends in History of Christianity)
5. Teloki bushitetba tem ABAM dangi abentsü (recommendation)

Item onuktem ajak nung Ao Khristam yimsü tetenzük otsütem aser otsüji kechi teti shisemtsü (refer). Iba sülenang ABAM, Molungkimong, aser Molungyimsen Arogoi leman lapoktsüra, otsüren nung adokba khuretem (issues) tesülen lemsateptsü.

SALT - 4 JI KECHI?

~Courtesy: *Fostering Climate Resilient Upland Farming Systems (FOCUS), Nagaland.*

- * süngjang lu aser tsünüsempongtsutem nung temolung agütsüba/ranglokba
- * "Agrofruit livelihood technology" ta ajar
- * alu/atsü ajunga nung noklang shilem nung roker (60%) po sungjanglijang atema wazüka ayuba.
- * temeyoktep süngjanglu nung mapang tatsü, talangba aser kanga talangka wazüka yua ajangzükdaktsüba.
- * Tenem lu ayimba nung SALT-4 yimya nung ayimbaji aluyimts? atema tsü mopung aser rongsenren tsütsü nung kanga agi tajungba.

STEP - 1 : BENDENBA ASER "A" FRAME AMSHIYIM SALT - 1 NUNG ALIBA AMA

STEP - 2 LINE KONG(CONTOUR LINE) YANGLUBA

Linekong yangluba

- * Inyaksangshits? aser tasazük sadema yanglutsü atema aie (grass) talang aser tenokdangtsütem/meinboronga aliba lepdokba.
- * Nisung ana senteper maparen ji temelaba aser tekaraba inyakteter - nisung kati "A" frame anepalutsü aser kati linekong tasazük tasadangba süng angüna asazüka ayutsü.

Linekong tasazük:

Linekong lazüktsü atema süklüp (metre) ana mesera asem tashi nung angüntsüla. Iba amaji linekong tatempang tashi asazüka yanglutsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pastor Jin Mingri'er kibongi sarasademtsür ajak dang pelaba lemsatep



Pastor Jin Mingri aser par jala, Grace Jin Drexel na noksa nung angur.

May 11, 2026: Tawa China nung tepuokdak nungi chioksang, Pastor Jin "Ezra" Mingri-i pa chioktsü atema inyakba atema US Tir, Donald Trump dang pelaba lemsatepba den külemi pa atema sarasademtsür ajak dak pelaba lemsatep.

Yaküm China nung ketdangsertemi underground ka mita aoba sülen Pastor Jin Mingri apu aser ita 9 tepuokdak ayuba sülen tawa chiokogo.

Pai aniba Arogoi sarasademtsü atema ayongzükogo.

Taküm US Tir Trump-i China semdangba mapang nung China Tr, Xi Jinping dang Pastor Jin tepuokdak nungi chioktsü mepishia liasü.

Iba sülen paston Jin tepuokdak nungi chiok aser July 5 nü US tonga ogo.

Pastor Jin'er kibongi sangdong ka ajanga, "Nenoki sarasademtsüba aser nungita yariba atema ajak dang pelar. Onoki atangji sayatenya mapa kuli süa nguogo aser onok kanga pelar. Iba tesüngmangtsü sayatenya atema onoki Tsüngrem nem tenüngsang agütsür. Onoki US Tir Trump aser pai aniba administration

danga pelar," ta metetdaksü.

Pastor kinüngtsü Anna Chunli Liu-ia X ajanga, "Tsüngrem nem tenüngsang agütsür, kechiyong asenoki sarasademba Pai langzüogo. Iba ama tensa mapang ka nung Tsüngremi onok atema iba sayatenya ya renemja liasü," ta metetdaksü.

"Iba ama tensa mapang ka nung onok nungita yarir ajak dang pelar. Tir Trump dang pelar; Secretary of State Rubio dang pelar; aser temepishiba shidi nung sign asür senators ajak dang pelar," ta laisa metetdaksü.

Yaküm October ita nung China nung ketdangsertemi Pastor Jin-i aniba Zion Church nungi lenirtem aika pua liasü aser tang tashi parnok 8 bo tepuokdak lir.

Human Rights Watch nungi Maya Wang-i X ajanga, "China nung Zion Church nungi parnok 8 tang tashi tepuokdak lir. Parnok ajak chioktsüla," ta metetdaksü.

Bodhbarnü Pastor Jin-i, "China Arogo nung tekolakji Yisu Khrista dang lir. Onoki sorkar anema meinyaker aser ketdangsertem tashi angar. Ajisiüaka onoki Yisu Khrista ya

Arogo nung tekolak ta amanger," ta metetdaksü.

"Yaküm October ita nung Zion Arogo nung lenirtem aser züngsem 28 den külemi ni apuba sülen ni China nung tepuokdak anogo 266 liasü. Ozü Arogo nung lenirtem aser züngsemtem parnok 8 bo tang tashi tepuokdak lir. Parnok mechiok tashi ni anisüngzük mangutsü," ta pastor-i metetdaksü.

"Ni chiokba ya China nung tamangertem atema putu tasen ka tetenzüker asütsü atema ni sarasademer. Arogo nung züngsemtem ajak chioktsü aser China ya tamanger ajaki sademsadema Tsüngrem külemtetba linük ka akümtsü atema ni sarasademer. Mezüngbuba nung house churches aser sorkari azüokba Arogotem ajak kasa züngshia temelaba agütsütsüla," ta pai metetdaksü.

Pastor kinüngtsüia Khristantem dang China nung tepuokdak aliba Khristantem ajak chioktsü atema lumia sarasademjang, ta mepishia metetdaksüogo.

China nung ita shia 9nübuba nung Khristantemi 'Day of Prayer & Fasting for the Persecuted Church in China' ayongzüka agir.

ANOGO ABEN TSÜNGREM DEN

TEMENEN NUNGI KÜMZÜKDI

"Kechivong ni kechi invaker alt ni memetet, kechiyong ni kechi invaktsä mulunger aji meinvaker: saka ni kechi sempar ajini inyaker" ~ Rom 7:15

Asenoki aiben Tsüngrem tsüngdang kümzü kang ta mepishiba mesüra ashiba yabo kanga melamela dang shiteter, saka Khristan tajung ka ama Tsüngrem tsüngdang ashiba amaji asenokia iba mapa nung ya teinyaktsü shilem tulu kar. Asenok taküm nung aiben temeneni anokshidang, khenkhenbo asenok tamang nung tashi meiti alir, aser Iba mapang nung ya asenoki meinyaktsüba sür nung, mejembitsüba sür nung aser melangzütsüba sür nung meteta yabo majunga ta sür, odang, inyaker, langzür alir.

Anungji, asenoki kechiji shitak meteter sür nung odang asenoki itemji meinyakteter. Tsüngrem tsüngdang yabo meshitaka ta metet saka pei-i meteta ya majung ta asübato inyaker. Ya kechi tai? Pauli iba lai tekongtem nung kuli agütsübaji,"Anungji joko ibaji ni meinyaker, saka kü dak aliba temeneni ibaji inyaker...saka ni kechi memulunger aji inyaker, ibaji ni masü, saka kü dak aliba temeneni inyaker...? Rom 6: 12 nungji ashir, temeneni asen taküm nung yimsü mesüdaktsütsüla. Kodang asen temang ya memeshiba ka ama lidir temeneni yimsü asütsü (Rom 6:13). "Anungji asen temang ya temeshiba ka ama Tsüngrem nem agüja, temenengi aseni akoktsüla" Tsüngremi asenok dang ya majung, yangibo tou, yangibo tekongshi ta ashibajibo asenok sasa tazüokba tashi Tsüngrem dang meshia meinyaktsüla.

SARASADEM:

Oh Tsüngrem kechi Ne tsüngdang tamajung lir aji onoki joko meyipa meinyaktsü nangzüker. Amen.

CTC Sunday anogomong nung sarasademtsü ayonger
CLARK THEOLOGICAL COLLEGE SUNDAY CHITENI (JULY) 12, 2026

Khrista nung aküm agüja aliba Sannüker aser temeim amangbapurtem,

Yisu Khrista temeim salem nenok ajak dangi Clark Theological College (CTC) ajanga abener. CTC tenzüker küm 54 tsüngda Arogo aser amangbapurtem ajaki CTC asoshi tamang tenla aser sarasadem nung nungita yariba asoshi pelar. ABAM Calendar nung aliba ama CTC Sunday July 12, 2026 nung amonger, anungji Arogo nung amangbapur ajaki tamang tenla den teküboklen agüja aliba sarasadem onük bilemteta mungtsütsü mepishir.

SARASADEM NUNG BILEMTETTSÜ ONÜKTEM:

1. CTC Board of Governors, Patrons, Life Members, Founding Members, Co-Sponsors, Co-Operating Churches, Trust, Award aser Scholarship Sponsor-temi bendanga agüja yaria arudagi; parnok asoshi sarasademtsüdi.
 2. CTC nung toklang tenzükertem Teaching Faculty 23 aser Non-Teaching Staff 27 lir, parnok taküm, kibongtem aser tenzükb wadang asoshi sarasademtsüdi.
 3. Academic Year tasen (2026-2027) June 11, 2026 nung tenzükogo. Student ajak agi 455 (DTh-5; MTh-80; BD-361; DCMM-9) enrol süogo. Parnok tazüngba aser tanela nung takok ngua aintsü asoshi sarasademjangma.
 4. Taoba Academic year (2025-2026) tembanga April 26, 2026 anogo nung 51buba Graduation Ceremony sentong agia student ajak agi 121 graduate süogo (DTh-3; MTh-40; BD-71; DCMM-7). Parnok taküm aser wadang balala nung tenzükb mapa asoshi sarasademtsüdi.
 5. Küm 54 tsüngda CTC nungi graduate asür Alumni ajak agi 2,637 kümogo, parnok Nagaland nung dang masü saka North East India aser alima tesem balala nung tenzükb wadang nung nokdaka lir. Parnok ajaki ochi aser tamang nung kuli asütsü asoshi sarasadem nung bilemtetdi.
 6. CTC nung Centre 4 (pezü) amenoka lir- Clark Centre for Leadership Development (CCLD), Clark Centre for Peace Research and Action (CCPRA), Clark Communication and Cultural Research Centre (CCCRC), aser Clark Centre for North East India Studies (CCNEIS). Item centre ajanga shisa token, aser sentong balala atonga leadership development aser yimjung mapa asoshi inyaker. Item Centre tem Tsüngremi temaba jenjang nung ajungketa amshiang ta sarasademjang.
 7. CTC Multi-Complex Building 2nd Floor (CTC Alumni Association Floor) August 7, 2025 nü Rev. Temsü Jamir, Executive Secretary, ABAM ajanga meshiteta sarasademer lapoktsüogo. Iba project ya tepor junga mapang shidak nung tembangdaksüba asoshi Tsüngrem nem tenüngsang agütsüdi.
 8. ABAM 150 Sesquicentennial aser CTC Golden Jubilee amongba tenüng nung CTC nung Kaketrang tasen (New Separate Library) tenzüka südaki. Iba project ya mapang shitak nung tembangtetsü asoshi senotsü, aser teyari balala Tsüngremi moajang ta sarasademdi.
 9. CCLD Building 1st floor August 28, 2025 nungi tenzüka inyaka arudar. Iba project ya mapang shitak nung tembangtsü asoshi tetenlar aser mapa inyakerter moajang ta sarasademjang.
 10. Tang tongtipang project ana teinyaktsü nüngdaka lir: M.Th. Post Graduate Men's Hostel, aser B.D. Women Hostel. Iba project ana ya tenzüka inyaka aotsü asoshi Tsüngremi senotsü aser teyari lemang balala lapokjang ta sarasademjang.
- Nenok den külemi Tsüngremer wadang nung tenzüker,

~~ Prof. Rev. Dr. A. Temjen Jamir, Principal, CTC

Trump-ï patepsettsü yimyimayimba sülen Iran amokmeren

Washington, Chiteni/July 11 (Agencies): Iran lenir Ayatollah Ali Khamenei den asüpila sentong nung Trump tepsettsü yimyim ayimba den Israel-i pa tepsettsü atema Tehran-i sentong yangludar, ta ashiba sülen United States tir Donald Trump Iran amokmerenogo.

Honibarnü Truth Social platform nung Trump-i, "Iran sorkari alima kübok tesem balala nung amokmerenba ama jenjang agia United States of America tir tinyakdak- koba tang ni lir- ka tepsettsü merangra mesüra tepsetra Islamic Republic of Iran dak khaloktsütsü atema missile 1000 renema lir aser ano meyirejang aika anidaktsü," ta zülutsü.

Paisa, "Iran kübok tesem ajak raksatsütsü atema tetuyuba agüjatokogo aser U.S. Military renema lir aser koka lir, koba küm ka atema asütsü aser iba mapang ya atsülangtsü akok," ta pai shisem.

Israel-i iba hopta tetenzüklen Trump tepsettsü atema Iran-i tasa tasen ka asaba indang US nem tekümdangtsü metetdaktsüogo, ta US media sangdong balala ajanga metetdaktsü.

Source temi CNN dang ashiba agi, Israel nunger itdangiteremi tasa tasen asaba indang osang tejangja agütsüogo. Wall Street Journal-ia tasa tasen asaba ya shitak ta jangjashitsüogo.

Iran nunger general Qassem Soleimani drone agi maka tepsetba sülen Tehran-i 2020 küm Trump anema mang ayangtsü nangzüka liasü.

Tang amokmeren tasen adokba sülen US Secret Service-i Trump dang iba hopta tetenzüklen Turkiye nungi NATO summit toktsür aoba mapang tayimtsü tanga ka nung aotsü mepeshia liasü.

Amokmere o aika jembiaka aser Tehran den ceasefire benoker aliba tembangogo ta shiaka yimjung atema maneni



Donald Trump

sensaksemdar, ta Trump-i ashi. Bodhbarnü Strait of Hormuz nung Qatar aser Saudi nunger rongtem amakba sülen US-i anonung ana tashi Iran amak aser parnokia middle east nung US nunger tamendakdak balala maka liasü.

"Islamic Republic of Iran-i sensaksem maneni akatsü asüngdangogo. Onokia mulunga agizükogo, saka United States-i parnok dang Cease Fire bo tembangogo, ta shiogo," ta Trump-i zülutsü.

US-i parnoki nongshiba atema telangzüba agüja Iran nunger yimjung atema sensaksemertem rongnung tongtiba aser parliament speaker, Mohammad Bagher Ghalibaf-i, Tehran-i US nem kodanga bendanga magütsütsü. Paisa, Pakistan teyongtsüi ia tenangzüktepba yangluba nungi Washington atsünginra linük kümzüka toktsütsü atema Iran kanga junga renema lir, ta ashi.

"Linük kümzüka toktsütsü atema onok renemshiba kodanga manen, aser kodang südir süaka America-i tenangzüktepba ashioktsüra onok renema lir. Rara tembangdaktsütsüba ya alima nung linüktem atema tongtibatiba lir, saka Iran bendanga agütsür iba rara ya kodanga metembangtsü ta metetdang," ta Ghalibaf-i ashi.

Kati ka amokmerenba den US-i anüng ajanga Iran kübok province pongu makaka, sensaksem maneni kadar. Qatar

nunger yimjung atema sensakseemertem Tehran-i ogo. Tasnim news agency sangdong ka ajanga ashiba agi, Strait of Hormuz nung security dak sendakba nung ken o sensak asemtsü atema Foreign Minister Abbas Araghchi Oman yimtiba Muscat-i ogo.

Pakistan Ato Kilonser Shehbaz Sharif-i phone ajanga Iran tir Masoud Pezeshkian den sensaksemogo aser tawa raratep tenzükshiba süoki ia bilemba lemsatepogo. Sharif-i Iran aser US naprongla dang azüzüktepa inyaktsü mepeshia metetdaktsüogo.

"Tang ano rara tenzükshiba sülen sensaksem bangdaker aliba tenzükshitsü atema inyaksangshi tenzükogo," ta Al Jazeera osangbener Mahmoud Abdelwahed-i Tehran nungi ashi.

"Ajisüaka US-i tawa Iran amakba den tir Trump-i amokmerenba sülen Iran nunger ketdangsürtemi America nunger tebilemba dak temulung malemer," ta Abdelwahed-isa shisem.

Kasa mapang nung Washington, DC nungi Al Jazeera osangbener Kimberly Halkett-i ashiba agi, "tenangzüktepba ka yanglutsü atema Iran-i nuclear dak sendakba nung inyaksangshi azüoktsüla aser nuclear material tem agütsütsü atema mulunga agizüktsüla. US nunger ketdangsür tejentemi ashiba agi, sensaksem takok ngua agiogo, saka Iran-i tawa shishilembadang amshiba rongtem amakba dak sendakba nung Iran nem ultimatum ka agütsüogo."

US-Israel nati Iran amak tenzükba sülen Iran-i Strait of Hormuz shibanga ayuba sülen alima ajunga nung toztü aser gas shibelenba nung tetsükdaktsü adoka jenjang tasak kümogo. Iba tzü lenmang lapoktsü atema sensaksema arudar, saka tang tashi rongtem sadem sadema mesenzüteter.

MULUNGNEN O



SENKATEMJEN OZUKUM
12:08:1955 - 04:07:2026.

Ozü temeim kinungbo aser tsürabur tajung **Lt. Senkatemjen Ozukum** (Mongsenyimti) mapang tatsüka temang manemi alidang aser pa iba lima nungi pilaa orr onok mangyim jashi tulu nung alidang, shirnokisa onok dang kangasa meima yariogo, nenok ajak dang onoki kanga pelaba lemsateper.

Onok timtem shisabolu mapang nenok temeim sarasadem, nübo aser rongsen agi yariba temeim mapatem asoshi onok bang agi meshiteba tepela nenok ajak den lemsateper. Nenok temeim mapatemji onok mulungjang nung teti alitsü.

Temeimer nisung aikati maparen jenti nung teyari tulu agütsüba den, ano, item kija kibong aser lokti tentetemi yariba asoshi parnok dang balaka pelaba shisemer :

1. Shri. Imkongmar Longkumer, Advisor for Minority Affairs and Sericulture, Govt. of Nagaland
2. Shri. Tonggang Ozukum, Advisor for Water Resource, Govt. of Nagaland
3. Shri. Neingutoulie Kenguruse, Councillor, Dimapur Municipal Council
4. Smt. Nzanbeni Humtsoe, Councillor, Dimapur Municipal Council
5. Shri. Arikumba, NCS, Deputy Commissioner, Shamator
6. Mr. & Mrs. K Tsukti Jamir
7. Mr. & Mrs. Sentisosang Jamir
8. Dimapur Ao Baptist Arogo
9. Dimapur Mongsenyimti Senso Telongjem.
10. Dimapur Mongsenyimti Tamang Telongjem.
11. Ozukum Illangba Aso, Mongsenyimti
12. Ozukum Illangba Aso, Dimapur
13. Mongsenyimti Metsubo Tsur, Dimapur
14. Mongsenyimti Ozukum Telongjem, Dimapur
15. Lanutoshi Zunga Mongsenyimti, Dimapur
16. Kevijau Colony Council
17. Kevijau Woman & Youth Organisation
18. Aoli Ozukum Telongjem, Dimapur
19. Transport Commissioner Office, Kohima
20. Ao Pensioner Association, Dimapur
21. Langpangkong Senso Telongjem, Dimapur
22. St. Paul Higher Secondary School, Dimapur
23. PM Shri Govt. High School, Thahekh
24. Town Ao Fellowship, Shamator
25. Eden Medical Centre, Dimapur
26. Apollo International Hospital, Guwahati
27. Guwahati Ao Arogo
28. Mongsenyimti Telongjem, Guwahati

Onok ajaki nenok ajak dang kangasa pelar.

- **Temeim Kinungtsü, Chirnur, Semchirtem, Anük-apang aser Kinungertem.**

Vietnam nung alima penzürtem mena aliba rong meküpok; nisung 15 asü

Manila, Chiteni/July 11 (Agencies): Vietnam kübok Phu Quoc asetkong nung Honibarnü rong ka meküpokba sülen India nunger alima penzür 15 süogo, ta VnExpress-i metetdaktsü.

Iba lendong nung nisung 21 bo kümzükogo, ta osang ajanga metetdaktsü. Rong nung India nunger alima penzür 32, crew asem aser attendant ka densema nisung 36 mena liasü.

Vietnam nung India embassy-i ashiba agi, parnoki iba tatalokba ya kanga junga asadangdar, aser lendong agi kongshir aliba kibongtem nem teyari agütsütsü atema Ho Chi Minh City aser Hanoi nung emergency response centre tem amenokogo.

"Iba tatalokba indang osang tejangja agitsü merangdar,

kechiyong local ketdangsürtemi achayanga teküzmükba maparen tang benoka inyakdar," ta embassy-i ashiba den iba ya kanga dang tia maka tatalokba ka ta ashi.

Iba rong ya Hon May Rut asetkong nungi An Thoi Port-i oya aliba mapang tzüyim-i meter 400 shi aiba sülen meküpoka liasü, ta ketdangsürtemi ashiba VnExpress-i metetdaktsü.

VnExpress sangdong ajangasa, tzüyim nung rong meküpokba mapang tzüsem tululu adoka liasü, ta metetdaktsü.

Phu Quoc ya Vietnam nung asetkong tulutiba lir aser iba ya linük nung alima penzürtemi kangadang bulua semdangba tesem ka kümogo. Küm ishika tsüngda India nunger aikati iba asetkong semdanga arudar.

Russia-i maneni Kyiv amak; nisung 10 yiruogo

Kyiv, Chiteni/July 11 (Agencies): Russia-i Honibarnü Ukraine yimtiba ballistic missile agi amakba sülen nisung 10 yiruogo, ta ketdangsürtemi ashi. Ukraine air defence injangtem supply ataba mapang Russia-i parnok aiben maka arudar.

Honibar anepdang air alert ola magütsü tsüngda yimti kübok tesem balala nung bomb apokba ola angashiba tenük kuli agütsürtemi metetdaktsüogo.

Russia-i ballistic missile trok, cruise missile trok aser drone 121 yoka liasü, ta Ukraine indang air force-i ashiba den, parnoki cruise missile ana aser drone 111 khadangogo, ta shisem.

Ukraine ket nung Patriot air defence systems indang injang peria mali, aser parnoki ita tsüngda ballistic missile tem khadangtsü mekoki arudar, kechiyong item missile tem ya ola indang speed dang nungi aiben agi tekaraba aoer.

Kasa mapang nung Russia-i hopta ishika Ukraine yimtiba ya aiben maka arudar. Iba ita parnoki Kyiv aser iba yimti temeket nung aliba tesem aiben makogo aser iba mapang nisung 60 dak tema tepsetogo.

Honibarnü Kyiv amakba mapang nisung maliba ki ka raksatsü aser ano tanga ki ka nungi mokozi adoka liasü. Iba den ano office building ka amakba sülen mi adoka liasü,

ta yimti military administration-i Telegram messaging app ajanga metetdaktsü.

Maneni transformer substation ka nunga mi adoka liasü, ta Mayor Vitali Klitschko-i ashiba den, nisung aliba ki kar nung kichibatam raksatsüogo, ta pai shisem.

Air Force-i ashiba agi, ajak senteper Ukraine kübok tesem 11 makogo.

Ukraine aser Russia na tawa asendenshir kati ka aiben maktepa arudar. Ukraine-ia Russia indang energy sector maka tetsükdaktsü aika agüja arudar.

Yimjung atema sensaksem bangdaker aliba mapang rara tamajungba dang küma aoer ama reprangteter.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yoksep

(v) kata manüing ajak yokma (sold out all)

* Benjong mapang dokan nung süoshi ajak yoksep.

Yokshi

(v) osettsüset ayokba (sell off)

* Benjong süir külen tanüingba süoshi jenjang dalang agi yokshi.

OLONG PAITEP # 7563

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S_ _ _ i
9. Nisung rongnung telemasa
10. Anogoshi
12. Ajanga aor
13. Tsük rizüingdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7562 TELANGZÜBA**TIPIEN :**

1. Karanur, 5. Entsü, 6. Lan, 9. Agi,
11. Akong, 12. Ain, 13. Tasen,
14. Oru, 17. Ati, 18. Kensü,
19. Khrista.

LANGTSÜNGLEN :

2. Amang, 3. Repranger, 4. Osü,
7. Tajangzük, 8. Rogo, 10. Itsü,
15. Ratet, 16. Sen.

NAI-A YA METETTER

Nagpur, Maharashtra nungi arishi küm 17 tain Hiten Dharpure-i "smallest fully functional electro-mechanical robotic arm" yanglutetba atema Guinness World Records nung züluokogo.

Dharpure-i yangluba robotic arm tasazük ya 39.250 millimetres dang lir saka iba device ajanga oset tilatem ajunga aruteter. Dharpure-i FDM-based 3D printing technology amshia iba robotic arm yangluogo.

Manipur nung Assam Rifles 2 tepsetha sülen senden amen**Imphal, July 11, 2026**

(Agencies): Manipur Home Minister Govindas Konthoujam-i CRPF Director General Gyanendra Pratap Singh aser tanga tongti ketdangsürtem den security tensa asadangtsü aser security agencies tsüingda amalitep akangshitsü atema senden ka menogo.

Ukhrul district nung telungpurtemi Assam Rifles sepai ana khasetba sülen anogo ishika ka lir iba senden menogo.

CRPF Director General Gyanendra Pratap Singh den Special Director General (Operations) Vitul Kumar, Special Director General (Northeast Zone) Raja Shrivastava, Inspector General of Police (Manipur and Nagaland Sector) R.N. Das, aser DIG S.K. Singh nunger den senden amen ta Minister Konthoujam-i ashi.

"Onoki onük aika lemsatepogo aser Manipur nung security tensa nung temulung agüja jembi. Onok tsüingda amalitep akangshitsü, operational preparedness tajungba akümtsü aser state nung yimjung aser security alitsü atema nangzüktepogo" ta pai ashi.

Central Reserve Police Force (CRPF)-i linük aser Manipur nung alirtem kümzüka ayutsü atema bendanga agüja inyakba atema tenüingsang agütsür ta paisa shisem.

TENUNGSANG AGÜTSÜR

Molungyimsen Senso Telongjem Mokokchung ajanga Lt. Moatemjen (Molungyimsen) par jabaso Wb. Limatongzuk Mozür-i UPSC Combined Defence Service (CDS) Examination ajanga Services Selection Board(SSB) nung takok tulu ngua 17 Dogra Regiment of the Indian Army nung Lieutenant mapa anguba atema pelaba lemsateper.

Iba ama Molungyimsen asoshi khonang tetushi bener arutsüba atema temulung nena Tsüngrem nem tenüingsang agütsür. Maneni teyanglur Tsüngremi pa takum linük tenzük wadang nung anema aliba arishi den azükarua moajang ta sarasademer.

Sd/-
Wb. Purtemsu
Tir, MSTM

Sd/-
Kilem
Tongti Tezulur, MSTM

Tripura nungi Dubai-i chiyungtsü bener yokogo**Agartala, July 11, 2026**

(Agencies): Tripura sorkari Hokobarnü Dubai-i organic agricultural products bener yokogo aser iba nung scented lemons, Kalikhasa aromatic rice, aser Queen pineapples dena lir.

Iba mapa ajanga state nung aluyimertem asoshi overseas markets ulushitsü ta Agriculture and Farmers' Welfare Minister Ratan Lal Nath-i ashi.

Ratan Lal Nath-i organic scented lemons 1,300, organic Kalikhasa aromatic rice 182 kg aser Queen pineapples 350 adenba consignment apusoa bener yok.

Khowai district nung Baramura Farmer Producer Company (FPC) ajanga scented

lemons, South Tripura district nung Trishna FPC nungi Kalikhasa aromatic rice aser Gomati district nung Khabaksa FPC ajanga Queen pineapples bener yoker ta Minister Nath-isa ashi.

Lulu Retail ajanga Gulf Cooperation Council (GCC) linük trok nung inyaker aser linük 85 tema nungi agricultural aser food products bendener ta paisa ashi.

"Lulu Retail indang marketing network nung Tripura nungi organic produce densemba ya konang ka lir" ta Minister Nath-isa shisem.

Tripura-i tawa tu Germany-i organic dried bird's eye chilli seret 10,000 bener yokogo ta paisa ashi.

Mkg aser Peren nung World population day mungogo**Dimapur, Chiteni/July 11**

(TYO): Alima ajunga den külemi July 11 nü Conference Hall, CMO office Mokokchung nung World population day mungogo.

Iba anogo ya "Healthy Timing and Spacing between Pregnancies for well-being of Mother and Child to prevent unintended pregnancies" omen nung ajemdaker munga liasü.

Sentong tatsüka agiba mapang DPO (UIP & RCH) Dr. Limanaro-i, World population day aser population Campaign ya koda tongtibang iba indang lemsatepba den family planning indang metetdakja liasü. Laisa, health center tem nung family planning service tapu balala agütsüba indang metetdaksütsü atema dang iba anogo amunger masü, saka tetsür aser tanur naprongla ajangzükdaksütsü atema tanur bena asoba tsüingda mapang koma ayutsüla iba indang tangazükba agütsütsü asoshi lir, ta ashi.

Lai, July 11 nungi 18 tashi population week amungba mapang block aser yimtsüing balala nung advocacy aser awareness campaign balala ayongzüka agitsü, kong Family planning tapu balala, contraceptives aser spacing method amshiba yimya, clients tem counseling aser temsüa aliba apuani tem family planning asütsü atema ajungmesotsüba densema alitsü, ta ashi.

DPO-isa, World population campaign mapang sterilization, IUCD amala service balala agütsütsü aser condom lemtsüba, ECP, OCP aser IEC materials tem lemtsütsü densema alitsü, ta ashi.

DPO-i Health Unit ajak dang VHCs, CHOs/ ANMs aser ASHAs tem ajanga Sterilization atema District Hospital Mokokchung tuyutsü mepeshia metetdaksüoggo. Sentong nung CMO, Dy.CMO, ASHAs aser CMO staff temi shilem agia liasü.

Kasa anogo Peren kübok

CHC Jalukie nunga World Population Day mungogo.

Sentong nung Family Planning ya koda tongtibang iba indang jembiba mapang DPO (RCH & UIP) Dr. Velentina Neikha-i, Family Planning indang metetdaksütsü ya kanga tongtibang lir ta ashi. "Healthy timing and spacing between pregnancies for well-being of mother and to prevent unintended pregnancies" omen nung ajemdaker jembiba mapang laisa, tanura bena asoba tsüingda mapang tapet ayutsü aser kibong tilaka dang asüba tajangzük aser family planning inyakim tapu balala indang jembi.

Sentong ya Samzai, BAC Jalukie block lenisüba nung agi.

Vasectomy, IUCD amala angati service aser Condom lemtsüba, ECP aser Counselling amala sentong balala ayongzüka agiogo. Sentong nung ASHA's, AWW's aser medical staffs temi shilem agi.

Spain-i Belgium koka semifinal tongtetogo



Belgium den asayaba mapang Mikel Merino-i Spain atema tanabuba goal idaktsü pelaba noksa nung angur.

Chiteni/July 11, 2026

(Agencies): July 10 nü Belgium den quarter final asaya nung Mikel Merino substitute ama ia Spain asoshi kanga dang tongtibang goal ka idaktsüba sülen parnok semifinal-i iogo.

SoFi Stadium, Inglewood nung Arsenal forward yagi minute 86buba nung Dani Olmo melen aser minute ana dang lir pai goal ka idakja Spain-i iba asaya goal 2-1 agi kokogo.

Merino-i idaktsüba goal ya asaya akoktsü atema Spain asoshi teperi liasü, kechiyong parnoki Belgium nem tanabuba goal idaktsütsü maongka magütsüri liasü. Küm 16 sülen tang mezügbuba parnok FIFA World Cup semifinals-i iogo.

Spain shirnoki 2010 küm World Cup benokogo, parnok FIFA World Cup 2026 nung France den semifinal asayatsü.

Asaya nung mezügbuba goal ya Spain atema Fabian Ruiz-i idaktsü, saka asaya mezügbuba shilem

metembang tsüingda Charles De Ketelaere-ia Belgium atema goal ka idakja goal kasasa aküm.

Iba asaya nung Kevin De Bruyne aser Jeremy Doku naprongla tentenzük nungi asaya saka warm-up mapang captain Youri Tielemans hamstring yiruba ajanga parnok kanga akoksa liasü.

Belgium pur Amadou Onana ACL yiruba ajanga tetsükdaktsü adoker aliba mapang ano Tielemans yiruba ajanga midfield nung second-choice asayartem dang asaydaktsütsüsa aküm.

Asaya tenzüker minute 30 tsüingda Pedro Porro aser Lamine Yamal na ball kanga junga belenshia aluba sülen Dani Olmo nem ball agütsü, aser pai metsüoktsüba ball ya Thibaut Courtois-i nokdang adokba Fabian Ruiz-i idakja liasü.

Belgium, shirnoki round-of-32 nung goal 2-0 agi asaya

mekoki aliba nungi meyipa tur Senegal koka liasü, parnok goal ka achiba agi kecha maoksa aser minute 41buba nung parnok goal ka idakja liasü.

De Bruyne-i Timothy Castagne nem ball ka agütsü koba pai cross asüba De Ketelaere dangi oa pai kanga junga tongokja liasü.

Iba goal ya taküm World Cup nung Spain pur mezügbuba goal achiba liasü.

Iba sülen minute 70buba nung Courtois yirur tugatok. Pa ya arishi küm 24 tain Manchester United 'keeper Lammens-i melena liasü.

Minute 88buba nung Cubarsi-i ball ka metsüoktsüba Lammens-i pupeter yokba substitute Mikel Merino-i idakja liasü.

Portugal den mapang apuloktsür asayaba mapang substitute ama ia goal ka idakja asaya akokba sülen Merino-i iba asaya nunga tanabuba goal ya idakja parnoki asaya kokogo.

India football team New Zealand nung oa friendly ana asayatsü

Chiteni/July 11, 2026

(Agencies): India tebur football team tang mezügbuba taküm küm tatemlen New Zealand nung oa asayatsü lir. November ita FIFA international window mapang India team New Zealand den friendly ana asayatsü, koba linük ana tsüingda mezügbuba senior team asayaba asütsü.

"100 Years of Unity Through Sport," nüngdem nung iba asaya ya ayongzükgogo, koba Ato Kilonser Narendra Modi-i New Zealand semdangba mapang sangdonga liasü.

Linük ana tsüingda mezügbuba asaya Go Media Stadium, Auckland nung November 12 nü asayatsü aser One New Zealand Stadium, Christchurch nung November 15 nü tanabuba asaya asayatsü.

Iba asayamung ya India team asoshi parnok tendangtsü atema maongka tajung ka

asütsü, kechiyong parnok Oceania nung football team tajungtiba ka den asayatsü lir. New Zealand team ya FIFA World Cup qualification nung teti asaya arudar anungjia head coach Khalid Jamil aser pai aniba asayartem atema iba ya tayongzükgoba tasen ka asütsü.

Maneni küm 20 tsüingda India team-i tang mezügbuba Oceania Football Confederation (OFC) linük ka semdangtsü lir. India team 2005 küm Fiji-i oa friendly ana asayaago.

Linük ana tsüingda aiben masayaka taoba mapang NZ den asaya dang India team-i junga asayaago. Team ana ya 1981 Merdeka Tournament nung mezügbuba asaya, koba goal ka danga magütsüi tembanga liasü. Tena tatamsa 2018 Intercontinental Cup nung asayaago, koba India-i goal 2-1 agi koka liasü.

Sarvesh-i Diamond League nung otsü tasen ka yangluogo



Sarvesh Kushare

Chiteni/July 11, 2026

(Agencies): National record bener alisang Sarvesh Kushare-i otsü tasen ka yanglua pa ya India nung high jumper rognungi Diamond League meet nung top 3 nung tembangba mezügbuba asayar kümogo. Monaco nung Diamond League meet mapang pai iba otsü tasen yanglua liasü.

July 10 nü mezügbuba Diamond League nung asayaba mapang Sarvesh ya tasembuba nung tembanga liasü. Pa ya Diamond League nung top 3 nung tembangba India nung asayar pezübuba kümogo. Pa masüidang javelin thrower Neeraj Chopra, long jumper Murali Sreeshankar aser taoba mapang discus thrower Vikas Gowda nungeri iba alizüing tongteter liasü.

National Inter-State Athletics Championships (June 24 to 28) Bhubaneswar nung 2.31m jukteta tebur high jump national record yangluba sülen Kushare-i iba asayamung nung 2.26m jukteta liasü. Iba asayamung nung Olympic aser world champion tema aika asaya liasü.

Ukraine nung asayar Oleh Doroshchuk-i 2.32m jukteta Monaco title aben aser Great Britain nunger Kimani Jack-ia 2.30m jukteta pa tanabuba jenjang nung liasü.

Title mebentetaka Kushare-

i kanga junga asayaago aser pa world championship asember koker alisang aser Tokyo Olympics gold medallist Mutaz Essa Barshim jakdang tembanga liasü. Italy nung Gianmarco Tamberi, USA nung 2023 World Championships silver medallist JuVaughn Harrison, Romania nung Beckford aser Matteo Sioli nung pezübuba nung tembang. Parnok ajaki 2.20m jukteta liasü.

Glasgow nung July ita 23 nü nungi tenzüka Commonwealth Games masaya tsüingda Kushare-i iba asayamung nung takok ngua asayaba ajanga pa ya medal asoshi toktepertem rongnung ka kümdaytsüogo.

Kushare ya arishi küm 20 asüba mapang 2014 Junior Championships nungiang national circuit nung asaya tenzüker. 2018 Indian Open nung pai 2.24m ajok aser 2019 Indian Open nung tajungba jukteta 2.26m ajok. Iba sülen pai 2022 Gujarat National Games nung 2.27m joka gold angu saka national record meyangluteti liasü.

Ajisüaka taküm June ita Bhubaneswar nung asayaba mapang pai 2.31m jukteta Tejaswin Shankar-i 2.29m joka national record küm ti tashi bener aliba ajatetogo. Pa ya India nung high jumper rongnungi 2.30m adena ajokba mezügbuba asayar lir.

Archery World Cup: India tetsür compound team-i silver angu



Chiteni/July 11, 2026

(Agencies): Archery World Cup Stage 4 nung India tetsür compound team-i silver medal ka ngua iba asayamung tenzükgogo. Honibarnü Madrid nung final asaya nung India team-i Colombia mekoki liasü.

India team nung asayar Jyothi Surekha Vennam, Prithika Pradeep aser Chikitha Taniparthi nungeri tongtibang mapang nung junga masayateti 228-232 agi Colombia makok, shirnoki kanga junga asaya-a gold medal nguogo.

Iba medal anguba ya season nung tatembangbuba World Cup

stage nung India asoshi mezügbuba medal liasü aser ano medal aika angutsü timla lir.

Final nung tamakok nguaka arishi küm 17 tain Prithika-i la dak sempet tajung aliba sayuogo. Lai 10s nung trokben akha aser tetsür compound semifinal atongba sülen kija asaya nunga medal angutsü timla lir.

Prithika semifinal nung Malaysia tsür Fatin Nurfatehah Mat Salleh den asayatsü. Lai iba asaya kokra iba asayamung nung India atema medal tanabuba angutsü jangja akümtsü.

Qualification round nung point 342 dang ngua 23buba nung tembangaka lai taruba round tem nung temlungtetba tulu nung asaya liasü.

Mezügbuba round atema bye anguba sülen lai tanabuba round nung Germany tsür Franziska Goppel 148-142 agi akok aser tasembuba round nung Souyk Korea tsür Park Jungyoon 145-144 agi koka liasü. Round pezübuba nung lai USA tsür Liko Arreola 147-146 agi akok aser Spain tsür Andrea Muñoz 140-135 agi akokba sülen semifinal tongtetogo.

BILEMDANGANG

"Pela alitsüba ya pi dak keta lir."